



*Minggu, 16 Oktober 2022*  
**Ogen: 1 Samuel 25:33**



Pantas Rukur



**A**bigail sekalak ndehara si pentar. Ietehna perbahanen perbulangenna man suruh-suruhan Daud e megombang janah ngerehken rawa Daud, minter ilakokenna sada perbahanen guna pepalem pusuh Daud. Sabap sura-sura Daud bas paksa si e munuh perbulangenna. Ipepulungna erbage-bage pangan, kenca si e minter ipenangkihna ku das kelededingen ijumpaina Daud. I bas dalam kenca iidahna Daud minter ia nusur bas keledena nari, jenari minter erjimpuh ku tapak-tapak Daud. Ipindona perkuah ate Daud segelah surut sura-surana munuh perbulangenna e. Ngidah perbahanen Abigail enda nina Daud "terpujilah Tuhan, Dibata Israel, si enggo nuruh kam sendah njumpai aku!" Surut ukur Daud, igejapkenna maka enda jadi erkiteken Dibata kap si nuruh Abigail ngolang-ngolangi sura-sura Daud. Ikatakenna pe bujur man Dibata, erkiteken kepantasan rukur Abigail erbahanca Daud la ngelakoken kejahatan (dosa) erbalas erkiteken perukuren si lanai jore. Perbahanen Abigail mereken ulih si mehuli; perbulangenna selamat bas pembunehen nari, bage pe Daud selamat erkiteken la ngelakoken dosa.

Senina Moria, wari enda si peringeti me ulang tahun kategorial Moria si pe-65 tahunken. Moria ibabai pantas rukur guna maba kiniulin man jabu, man kalak sideban bage pe man tinapa sideban. Bagi Abigai rukur, kai banci ibahan guna pehuliken dengen nelamatkan jabu ras kalak sideban. Adi Paulus ngatakenca, ukurken si mehuli, si bujur, mulia, benar, bersih, mejile ras kerina si patut ipuji (bd. Pilipi 4:8). Kenca iukuri lakokenlah segelah keselamatan e jadi nandangi jabu ras kalak sideban. Moria berusaha nelamatkan tinapa si enggo mulai ceda enda alu ngelakoken penanaman pohon ras kebersihen, alu pengarapen kerina kita bas inganta sekalak-sekalak pe ngasup ngukuri dengen ngelakokenca pe.